

CARTA DEL APOSTOL SAN PABLO A TITO

Pablo embesa mondo Tito je

1 ¹Pablo rei se. Dios rimba. Jesucristo chimbaaquiatu. Dios que semondo ñee ñee sacua uchiirabo je ra. Ûquĩ Dios icua tuchi sacua ñgue semondo ra. Siqui turã sacua Dios rã si. ²—Sechiirabo ra amingo bei, i que Dios cose ra. Ñee ñooño eã ndae. Ûquĩ ndese embiirandu sacua ño ñgue semondo ñguiã. ³Dios rei nanderirõsa mbae icua si. Ae que seirabo ucheẽ nenei nenei sacua mbia je ra. Eĩ ñgue Dios ucheẽ mbuchecua mbia je cote ra. ⁴Aico ã mbesa ndeje a, Tito. Ereico Jesús icuate se rã si aque. Nyebe aico ñguiã “seriirĩ” i ndeje co. Nanderu chõ Dios re. Sã nanderu turã ndiqui bei ndeje. Sã Jesucristo abe turã ndiqui ndeje. Sã ñquĩ ia eã tuchi riqui nderese. Sã ñquĩ ndiqui nembia turã tuchi.

Sã Jesús quiato rerecua riqui turã

⁵Ae nandesaã ja eã huee nae, ñquĩ esaã ja rã ñguia nde huee. Amei mo eirabo rabo Jesús quiato rerecuarã. Mbia recua ja ja jenda. Secheende ndeje eirabo rabo ño huee. Nyebe arerecha ñguiã huee Crétaa. ⁶Amei turã ño eirabo rabo Jesús quiato rerecuarã. Eninisi miĩ nderecua chõ eirabo. Ae ririĩ Jesús icua quia nae, ñquĩ miĩ ño eirabo rabo. Ae eririĩ seteãte riqui nae, ñquĩ ño eirabo rabo. Ae eririĩ teã eãte nae, ñquĩ ño eirabo rabo. Jesús quiato rerecuarã. ⁷Jesús quiato rerecua quia Jesús quiato teaquiatu quiatu quia. Ûquĩ siqui icua aroneate. Ucuasu abe raã naa aroneate. Eroseĩ ñguiã aroneate. Quiacua aroneate. O rerequia chooñoa aroneate. Mbia mo mbae oseĩ oseĩ aroneate no. ⁸Mbia nyoĩ mose echuchúaa, isi turã ndae. Siqui turã ndae. Ndua ndua ra mbae ao nonde. Siqui eã nda mbae icua ndese. Dios rã si chõ nda eriqui. Echiichati

eã ndae. Jesús quiato rerecua ra eĩ mbei quia. ⁹Sã eriqui bei Dios cheẽ ndese nandechẽ nguire. Ûquĩ mose ra ùquĩ abe mbia mbaaquiato quiatu turã. Jesús osei uquia ee. Mbia icuã ñee nda embutiba Dios si. Ûquĩ ño eirabo rabo Jesús quiato rerecuarã, Tito. ¹⁰Mbia teã teã je tubiriãte riqui ã. Judíos teã teã je abe tubiriãte no. Ñee ñooño tuchite equia ã. ¹¹Ûquĩ nyuru esiquisã tuchi. Mbia mbaaquia tu icuã icuãte quiatu nguiã ùquĩ. Eru mbiĩrĩ irĩ. Eninisi abe mbiĩrĩ irĩ. Eriĩrĩ ja abe no. —Mbia ra umbae mee mee nande je, i chõ nguiã ã. ¹²Hue jenda mo ngue ñee nda. —Ñee ñooño je chõ ure re, Creta jenda re. Ureicuã mbei chõ ure re. Nyacua icuã na ño ure re. Uretomei ño ure re. Mbae mburireãsa chõ ure no nde, i que Creta jenda mo nda. ¹³Ichõĩñoa tuchi chõ ñene. Nyebe echeẽ asi tuchi ùquĩ je, Tito. Ì nda eriqui tuchi Jesús rese. ¹⁴Ì nda eriqui eã judíos icuã ñee ndese. Mbia tubiriã Dios cheẽ isi teã teãte quia ùquĩ. —Ûquĩ ñee nda jemumbayãchĩ jẽ, ere chõ mbia hue jenda je. ¹⁵Echiã mbuturã ji je chõ mbae turã ja riqui nguiã ã. Echiã mbuturã jiriã je quiatu mbae mo turã eãte re. Dios icuasa reã je mbae mo turã eãte. Ndua turã eã mbei. —Eicuã eã, i chõchĩ nguiã mbae icuã ndese siqui siqui. ¹⁶—Dios ureicuate quia ã, ichõĩño equia ùquĩ. Echisaã nguiã eicuãte re. Nyebe nandeico nguiã eicuate, Dios rese siqufã mose. Aba biã tuchi chõ ùquĩ nde. Aba cheẽ mumbasa. Siqui aroneate mbae turã mo ndese.

Mbia embaaquiato turã, i Pablo ñee Tito je

2 ¹Nde quia mbia embaaquiato quiatu turã jẽ. Dios cheẽ ndui si embaaquiato quiatu. ²Amei embaaquiato quiatu. Enyere chõ ñee ee: —Jẽquiagua quiacuachĩ nda jẽ. Jengata turã mbei chõ nguiã jẽ. Jëaracua bei chõ nguiã jẽ. Dios jëicua tuchi chõ nguiã jẽ. Jenyesequa tuchi quia mbia rese jẽ. Jëingo tochi chõ nguiã no jẽ, ere chõ amei mbaaquiato quiatu, Tito. ³Ari abe embaaquiato quiatu. Enyere chõ ñee ee: —Jengata turã mbei quia Dios resa rae. Jeñee icuã icuã techĩ nda mbia mo nii jẽ. Jẽquiagua quiacuachĩ nda jẽ. Mbae jësaã turã ño nguiã mbia resa ráee jẽ, ere chõ ari mbaaquiato quiatu, Tito. ⁴Sã ari acuanĩ mbaaquiato quiatu. Ì nda acuanĩ nyesequa jaaja ngu rese. Ì nda nyesequa jaaja nguiĩrĩ abe rese. ⁵Ì nda acuanĩ aracua ja ja. Ì nda ndua ndua ja mbae turã ndese. Ì nda uchuchua jenda abe mbuturã turã ino no. Ì nda eturã mbia je. Ì nda ngu cheẽ abe mumbayã no. Sã ari eĩ acuanĩ mbaaquiato quiatu. Ûquĩ mose mbia ñee icuã icuã aroneate Dios cheẽ nii. ⁶Acuanĩndu abe embaaquiato quiatu quia no. Ì nda earacua racua ja. ⁷Nde abe ecuata turã mbei, Tito. Mbae turã esaã uquia mbia je. Ndeico mose mbia mbaaquiato quiatu, cochee chõ eico. Echĩmbirãtã tuchi chõ nguiã. ⁸Ndeico mose mbia mbaaquiato quiatu, echeẽ turã turã ño nguiã ee. Ì nda mbia ñee icuã eã ndecheẽ mose. Ì nda Dios cheẽ ndesenda reã ireĩ ireĩ ndecheẽ si. Ì nda ñee icuã eã jëje. ⁹Mbia rimba abe embaaquiato quiatu. Enyere chõ ñee

ee: —Jenderecua cheẽ nda jemumba mumba techĩ nguia jẽ. Echeẽ nguire jẽingo bei chõ mbae turã ndese jẽ. Jeñeechĩ nda echeẽ ndibishorõ jẽ. ¹⁰Mbae mo nda jembuquia chãchĩ jẽ. Jẽseteã ño jẽingo mbae turã ndese jẽ. Eĩ jenyẽ mose ra mbia ñee turã Dios cheẽ nii, jenyẽ chõ nguia mbia rimba je.

¹¹Dios que uturã teacuquia mbia je cote ra. Mbia rirõ ja nonde mbae icuã si. ¹²Mbae ja rĩĩ Dios riqui nandembaaquiatu quiatu co. Ae echosei chiãte quia nae, ùquĩ nandesecha ja sacuã. Ae icuã nandebite riqui nae, ùquĩ ndecha ja sacuã no. Nandearacua sacuã abe no. Nandeico sacuã mbae turã ndese no. Nandendua bei sacuã Dios rese abe no. Eĩ nande bei quiatu quia nande namo. ¹³Jesucristo ra tu íbii ucheẽ nguire. Enininya tuchi ra tu. Nandeico eraarõ arõ ã. Ae ra nandembiate u. Ae rei Dios tuchi. Nanderirõsa mbae icuã si. ¹⁴Ae que tu mano nande je ra. Nandeicuã ndibishorõ ngue mano nda. Nandechiã mbuquishĩ ngue u umbaerã nda. Nandeico tuchi sacuã mbae turã ndese. ¹⁵Enyere chõ mbia mbaaquiatu quiatu, Tito. Ererecua rã ño eico embaaquiatu quiatu. Echeẽ asi asi jiri quia ee. Sã emo ndiqui ndecheẽ andu sereã nea eã.

Dios uturã teacuquia nande je

3 ¹Echeẽ mbia je, Tito. —Ererecua cheẽ nda jemumba mumba techĩ nguia jẽ. Ererecua cheẽ jeñandu quiatu quiatu quia jẽ. Jeñimbirãtã tuchi quiatu mbae turã naa naa nonde jẽ. ²Jeñee icuã icuãchĩ nda emo nii jẽ. Jeñee icuã icuãchĩ nda jenyue jẽ. Jeseteã ño jẽingo jẽ. Jenguasú ra jẽsaã saãchĩ emo je jẽ, ere chõ mbia je, Tito. ³Nandearacuayã techĩ nande abe nyii. Nandeteã teã techĩ equia nyii. Nandembĩĩrĩ irĩ ji raanguiate nandeicochĩ nyii. Ae nandechosei chosei quia mbae icuã nyii nae, ùquĩ achõ ndesete nandeicochĩ nyii. Mbae icuã ndese nandeico techĩ nguia nyii. Mbia mbae nandechosei chosei techĩ nguia nyii. Mbia mae icuã icuã techĩ nguia nanderese nyii. Nande abe nandemae icuã icuã techĩ nguia nandechiese nyii no. ⁴Dios ia eãte que mbia rese aque mose ra. Uya eã ngue eteacuquia nande je ra. Uturã abe que eteacuquia nande je no nda. ⁵Aque mose que nanderirõ mbae icuã si ra. Eya eãte quiatu ngue eriqui nguia nanderese. Nyebe nanderirõ nguia mbae icuã si. Nandeturã nii eã ngue re. Nandechiã ngue eirei mbiasu ra. Espíritu Turã je que nandechiã mbiasu ra. ⁶Dios que Espíritu Turã mondo tuchi nande je ra. Jesucristo rĩĩ ngue emondo nande je ra. Jesucristo rei nanderirõsa tuchi nandeicuã si. ⁷Dios que Espíritu Turã mondo nande je ra. Uturã je nandembirõ sacuã. Nandemingo bei tuchi sacuã no. —Nandemingo bei tuchi rae, sã nandeico i ã no. ⁸I chõĩñoa tuchi chõ ã nde. Æ esenei senei tuchi quia mbia je. Ĩ nda mbia emumbayã. Ĩ nda Dios icuasa siqui ja mbae turã ndese. Ae rĩĩ aico ñee jẽje nae, sã mbia ùquĩ ñee mumbayã ja quiatu. Aba bite ùquĩ. ⁹Mbia ñee asi asi je si ehui chõ. Mbia ñee mbei

mose ngãmei ndaaque riĩ, ũquĩ abe si ehui chõ. Mbia ñee icuã icuã mose nyue, ũquĩ abe si ehui chõ. Ae Dios senei senei nquia judíos je cose nae, ũquĩ ñii mbia ñee icuã mose nyue, ũquĩ abe si ehui chõ no. Aba biãte ũquĩ ñee. Aba mbaaquiatsu ãte ũquĩ. ¹⁰Emo Jesús quiato mbuqueta queta mose embiicuã nonde uchue, ũquĩ abe si ehui chõ. Eicuañte ũquĩ, ere ee. Ndecheẽ andu eã mose, echeembe ee. Aquere ehui chõ esi. ¹¹Aba chiicuate ũquĩ icuã. ũquĩ siqui turã aroneate quia ũquĩ. Huicuã eicuate quia ũquĩ.

Pablo embesa hui bei

¹²Artemas nda amondo nderea reae. Ae oso eã mose, Tíquico ra amondo ndeje. ũquĩ mo ngasẽ mose huee, echu serea Nicápolis cote. Huee taico bei ama mose, ae que se ra. ¹³Apolos embucuata turã mondo. Zenas ndese. Zenas ndei embesasa. Jesús quiatote ũquĩ. Mbae mo emondo ee. ĩ nda echoi turã. ĩ nda mbae tiã eã ee. ¹⁴Sã nanderesenda riqi mbae turã naa naa mbei ñimbaaquiatsu. Emo mbae ua mose, sã mbae mo mee mee ee. ũquĩ naa naa mose, siqui turã ño nguiã ũquĩ cote. ¹⁵Ae chi ja serese a nae, ũquĩ saludos mondo quia ndeje aque. Ae Jesús quiato nyesequate quia urerese hue jenda nae, ũquĩ je saludar ere ure je. Sã Dios turã ndiqui tuchi jẽ ja rese. Amén.